

亦漏其八九而聖明於此等微事如是激惱豈不大妨於言路耶臣在田野得聞此報心竊憂歎願從今加勉無復有如許過舉幸甚上嘉納之晚成在鄉上疏陳情勢乞遽命勿辭從速上來○己卯兵曹啓羅州營將張萬里南原營將李升來託疾厭進請依邊將厭避律准期本鎮充軍從之未幾領議政申琬為陳其實病旋寢人謂公法不能勝私○庚辰北方有氣如火光○辛巳流星出五車星上入乾方○壬午引見大臣備局諸宰左議政李畬首以開聖聰廣言路陳戒上嘉納之右議政金構曰頃聞藥房入診時下教及醫官所傳近來玉色消瘦病源不淺蓋公事必盡為酬應而後方進御膳多有中氣虛乏之時且於朝臣論議過激處聖心激惱雖旋即釋然伊時自覺不平云臣竊憂憫凡人筋力有可及而處之以怠惰則其責在我若其精神之不逮日力之不足則末如之何萬機雖煩顧何至於丙枕之不安玉體之傷損乎昔宋臣富弼奏事拂意玉色嚴厲弼正色曰天子喜怒固有其節一時辭氣非天子之怒帝為之霽怒此誠格言也夫帝王喜怒刑賞物各付物已無所與焉苟或出於激惱則非但害於事亦且害於政况聖躬疾病之源未必不由於喜怒之失節則今日之憂莫大於此害事害政有不暇言唯願平心靜養益勉聖德以盡慎疾之